

dil soldaneto, per poter insieme regnar e prevalerse da' emuli. Tra lhor signori si dice esser gran discordia, si crede verà novità; ogni zorno le sue forze va manchando e la reputation, *adeo* 6000 arabi si hanno acostato al Cajero poco lontan dil castello, dietro i qualli andò molti mamaluchi con alcuni signori per darli la fuga, e dicti arabi si voltano verso lhor e amazono trenta mamaluchi in zercha, et altri feridi assai, tra i quali fo ferido tre signori el diodar, Teni Campsom qual fo armirajo dil castel di Alexandria et el castelan dil castello dil Cajero. Il soldam à abuto a mal questo e li mandò dietro molta zente per vendicarsi acciò non si acosti più altro nostro, e questi trovano una dona del gran bassà dil Turcho la qual andava a la Mecha con zercha cavali 300 et homini 500, i quali fono tajati a pezi da dicti arabi, et questa fo quella vene a Damasco honorata etc. *Item*, il morbo al Cajero 200 in 300 al zorno, et li in Alexandria si stava bene, uno over doi al zorno, si spera si risanarà. Data in Alexandria a di primo zugno.

In questa matina in collegio fono aldit i oratori di Verona, voriano il contà pagasse il subsidio come lhor per la portion, e a l' incontro fono aldit quelli dil contà dicendo non dover pagar.

Da poi disnar fo pregadi, non vene il principe, et nui parenti di sier Beneto Sanudo consolo a Damasco comparessemo a la Signoria pregando volesse mandar via sier Alvixe Arimondo electo suo successor, qual chiamato promesse andar col primo passazo.

*Da Roverè, di sier Nicolò da cha da Pexaro podestà, di 7.* Come havia auto aviso che in Castelvorno è uno agnelino, e dovea venir fanti 300, mandò alcuni valenti homeni in Castelbarco ch' è nostro. *Item*, ha inteso quelli di Castelvorno non l' à voluto dar ni, a lo episcopo di Trento ch' è suo, ni al capitano di Trento qual è stato li in persona, et è stato etiam domino Antonio di Agresta. *Item*, per uno venuto dil campo regio di Venosa, referisse esser poche zente, et che fono scoperti agnelini e sguizari in una valle, et il paese esser in fuga, haveano mandà per zente comandate, et pagandoli andasseno in campo. *Item*, come esso podestà havia lassato quel corier fu preso con le lettere per inadvertentia dil suo cavalier, sichè la cossa è discolpata.

In questo pregadi referite sier Marco Lippomano el cavalier la sua legation di Milan, quasi quello disse in collegio, et questo di più: come el ducha si consejava col suocero ducha di Ferrara qual è nostro inimico, e quando fe' la sententia di Pisa fo di consejo suo. *Item*, el ducha devedò zà do mexi niun di Milan parlasse a esso orator nostro, et il conte Ugo

di Sanseverin venuto a parlarli lo fe' retenir. *Item*, el ducha ha do fioli maschi, il mazor à anni 7 et si chiama principe di Pavia, nome Maximiano, e uno altro chiamato Sforza, è mal sani. *Item*, do naturali, et il fiol dil ducheto, morse, chiamato signor Francesco à anni 9, è in libertà con la madre, et li populi l' amano assai. Hermes fo fratello dil ducha morto è in pocha reputation, va dove el vuol; e el conte di Melzo suo fratello natural di ditto Hermes è in gratia dil ducha. Conclude le cosse di Milan è in mali termini, e il ducha havia fato fin el zorno si parti 15 milia fanti. Et quando andò esso orator a tuor licentia, il ducha disse ve la daremo adesso si volete, et lui rispose veria un' altra volta a tuor comiato da soa excelentia, e poi li fe' lettere di passo, e do scalchi lo compagnò fuor dil teritorio suo. *Item*, havia spexo in quella legation di mexi 28 in ordenario ducati 2786, in extraordinario 334, in salarii 679, in cortesie 50 ducati, summa tutto ducati 3849, et potea spender ducati 1800 più. Et vene zoso di renga; et che l' ducha havia dà taja a Novara ducati 30 milia. Et sier Luca Pixani el consejer vice doxe lo laudò, poi ritirato a sentar, era di la zonta.

Fu posto parte, per tutte tre man di savii, di dar grossi 22 per testa di quelli anderano su la barza, a sier Sebastian Moro, qual li fazi le spexe, et per sua cauzion li sia obligato le decime dil clero si meterano, detrati prima ducati 10 milia, et quelli fosseno anziani. Et have tutto il consejo. Et è da saper si scuode per ogni decima de' preti, ducati 20 milia.

*Item*, fu posto, per nui savii ai ordeni, mandar una fusta di l' arsenal a Sibinico, atento quelli si oferiscono armarla lhor e star a custodia, etc. Have solum una di no.

*Item*, fu posto, per li savii dil consejo e di terra ferma, di astrenzer le do decime ultime dil Monte nuovo sono ai governadori per tutto sabado, *aliter* siano mandati debitori a palazo; et ditta parte have tutto el consejo, e fu presa.

*Item*, fu posto, per alcuni consejeri et i savii sopraditti: di scriver a l' orator nostro a Roma, debbi dir al pontefice lo episcopà di Trevixo zà 15 anni esser sta dà al vescovo di Rossi, et hessendo hora manchato domino Nicolò Franco, soa santità vogli darlo a ditto di Rossi; e poi sia scritto a Roma per la nomination di quel di Civald dove è il Rossi. Et dita parte have 9 di no, el resto di la parte, e fu presa.

*Item*, fu posto, per sier Domenego Marin, sier Filippo Trum el procurator savii dil consejo, sier Francesco Trum, sier Alvixe da Molin savii da terra ferma, sier Marin Santudo, sier Vetor Capello e sier